



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 7

Miami Open: Sinner aser Dimitrov na Final asayatsü

Haiti: Jimmy-i sorkar tasenba atema sensaksem nung shilem aginer

VOL. XXI ISSUE NO. 167 (ADOK 167) DIMAPUR AMUNGNÜ (SUNDAY) METSÜREMI (MARCH) 31, 2024 ₹ 5.00

Cabinet aser ENLU-i ENPO dang election nung shilem agitsü ayongzüker

Kohima, March 30, 2024 (DIPR): March 30, 2024 nü Nagaland state Cabinet aser Eastern Nagaland Legislative Union (ENLU) den külem senden ka amendang Eastern Nagaland People's Organization (ENPO) dang Lok Sabha Election nung shilem agitsü atema mepishitsü lemtetogo.

Senden nung ENLU züngsemtemi tawa parnok Delhi-i aoba aser March 28, 2024 nü Tuensang nung ENPO den senden amenba osangtem lemsatepa liasü.

Cabinet aser ENLU

züngsemtemi Lok Sabha Election nung shilem agitsüba onük benoka lemsatep.

Idangji parnoki ENPO dang April 19, 2024 nü Lok Sabha Election agitsü aliba nung shilem agitsü aser democratic mapa inyakba ajanga Eastern Nagaland asoshi tajangzük tuluba ngudaktsütsü asoshi ayongzüksü bangjemtep.

Centre nung nungtugu sorkar tasen ka akümba ajanga ENPO-i akhangba onüktem tajungba lemsatepa otettsü ta Cabinet aser ENLU züngsemtemi ashi.

Nagaland nung tsüingsang majungtsü: NSDMA

Dimapur, March 30, 2024 (Agencies): Taruba anogo ishika tsüingda tsüingsak-mopung aser tzunglu arutsü akok ta Nagaland State Disaster Management Authority (NSDMA)-i Honibarnü metetdaksüogo.

Tsüingsang-mopung majungba aanga lendong kar atalokra pei pei district disaster management authorities (DDMAs) nem osang sangoktsütsü asoshi NSDMA-isa ashi.

March 26, 2024 nü Peren, Niuland aser Phek district tem nung yipru süidang joej kiojen aser alua aika raksatsü.

NSDMA aser DDMAs-i Peren district nung takoksa ajuruba kibongtem nem tang atema teyari agütsüogo aser Niuland o Phek district tem nung teraksa bentsür aruba asandangdar ta NSDMA-i metetdaksü.

DDMAs ajanga NSDMA-i tensa mita repringdar aser takoksa ajururtem yaritsü merangdar ta parnokisa ashi.

Takoksa ajururtemi pei pei DDMAs den tongteptsü mekokra bangdak circle Administrative officers den tongtepa osang sangoktsütsü metetdaksüogo.

Yipru agi kanga mejungi kongshiba yimtsüng 10 nung tarpaulin sheets 220 agütsüogo. Iba dak alia teyirurtem nem medical aid agütsüogo ta Peren District Disaster Management Authority (DDMA)-i ashi.

March 26 nü yipru agi kanga mejungi kongshiba Ahthibung aser Tenning subdivision dangi assessment teams ana yokogo. DDMA-i March 27 nü osang metetpelatsü aser sorkar dangi report abentsü atema assessment teams yok.

Arunachal nung BJP candidate 10 den tetokteper mali

Itanagar, March 30, 2024 (Agencies): Arunachal Pradesh nung assembly elections maparen ano junga metenzükdang Bharatiya Janata Party (BJP) candidate 10-i takok nguogo.

Assembly election atema nominations meyipa agiba aser ano constituency kar nung opposition candidate maliba ajanga BJP candidate temi takok angu.

April 14, 2024 nü Arunachal Pradesh assembly election agitsü aser polling masüidang züngsem 60 agi akümba Assembly nung BJP MLA 10 kümogo.

Arunachal Pradesh nung Election In-Charge inyaktsü

atema Assam Minister Ashok Singhal shimogo.

Opposition melii takok angurtem: Pema Khandu, tang teinyakdak Chief Minister (3 Mukto constituency), Chowna Mein, tang teinyakdak Deputy Chief Minister, (46 Chowkham constituency), Er. Ratu Techi, 15 Sagalee constituency, Jikke Tako, 20 Tali constituency, Nyato Dukam, 23 Taliha constituency, Mutchu Mithi, 43 Roing constituency, Hage Appa, 17 Ziro Hapoli constituency, Techi Kaso, 13 Itanagar constituency, Dongru Siongju, 7 Bomdila constituency aser Smt Dasanglu Pul, 45 Hayuliang constituency.

N.F.Railway nungi tongti ketdangsertem Tuli-i arutsü, Tuli - Dimapur tsüingda Passenger train jajadangtsü



NF Railway headquarters Maligaon nung NFR ketdangsertem den BAN lenirtem parnok March 26, 2024 anogo nung amenba senden temer agiba noksa ka yangi angur.

Dimapur, March 30 (TYO) : Northeast Frontier Railways headquarters Maligaon nungi tongti ketdangsertem yakta Tuli Railway Station asentensha lapoktsü atema repringdangtsü asoshi arutsü aser Tuli aser Dimapur na tsüingda nübortem kenü nung lulena jajattettsüa train senzü tenzüksü merangtsü ta NF Railway nung General Manager, Wb.Chetan Kumar Shrivastav-i metetdaksüogo.

Pai iba o ya tan March 26 nü NF Railway Headquarters Maligaon nung pa office nung Business Association of Nagas (BAN) lenirtem den senden ka amendang metetdaksü.

Iba senden nung BAN nung tir Wb.L.Mongkum Jamir-i anir BAN lenirtemi NF Railway nung tongti ketdangsertem dang tamalen Tuli aser Mariani tsüingda train junga mejajattetba kuli indang angatetdaksü aser tang Tuli nung Nagaland ajunga asoshi train station tuluba kuma lapoker nisungtem amenba train den khu abenba train dena jajatsü rongdak nungdakba indang metetdaksü.

BAN lenirtemisa Dimapur train station-a alima nung railway station tajungtem rongnung ka ta asütsüa yanglutsü nungdakba indanga lemsatep. Ajisüaka, NF Railway nung ketdangsertemi ashiba agi, Dimapur train station kanga junga yanglutsü asoshi sentong nung enoka lir aser senotsüa peria lemezükja lir, saka nisungtemi ali atsünga agiba agi mapa inyaka moutetter, anungji ali atsünga agibatemi meyipa magitetra, sentong nung aliba amabo meinyaktettsü, anungji tang aliba station tilakaji dang yanglushitsüa akümttsü.

Item terenlok mapatem dak sendakba nung akok tashi BAN lenirtemi nübortem ajurua shisalemsateptsü aser NF Railway nung ketdangsertem dena yariteptsü ta metetdaksü.

BAN telokisa Dimapur ajanga jajaba train-tem mapang talangba anenzüksü aser train nung khu abenba jenjanga ajemtsü asoshi NF Railway lenirtem nem temepishiba ken o ka agütsüogo. BAN telokisa Nagaland nungi tangaleni Nagaland nung züsentetba aser yanglutetba

chiyongtsü aser osettem jenjang dalangba aser temelaba nung yoktettsü asoshi sentong yanglur NFR ketdangser nem agütsütsü lemtetogo. Tang tashibo Dimapur train station ya NF Railway kübok nübortem oli aruli jajaba ajanga senotsü ajangzükba nung jenjang tanabuba nung lir.

NF Railway aser BAN telongjem senden nung adenertemji NFR General Manager, Wb. Chetan Kumar, NFR nung Principal Chief Commercial Manager, Wb. Prabhas Dansana, NFR nung Principal Chief Engineer Wb.Sandeep Sharma, NFR nung Principal Financial Advisor Wb.Bijaya Kumar, NFR nung Chief Transportation Planning Manager Wb.Atul B Rane, NFR nung Chief Passenger Transportation Manager Wb. Rajesh Kumar aser NFR nung Deputy Chief Commercial Manager Wb.Kapinjal K Sharma nungertem liasü aser BAN nungi tir Wb.L.Mongkum Jamir-i anir Wb.Rena Ezung, Wt. Lemjan Phom aser Wb.Akum Jamir nungertem liasü.

Nagaland Lok Sabha election nung candidate 3 lir



Dr. Chumben

Supongmeren

Hayithung

Kohima, March 30, 2024 (TYO): Nagaland nungi Lok Sabha menden ka atema Congress candidate S. Supongmeren Jamir, NDPP candidate Dr. Chumben Murry aser Independent candidate Hayithung Tungoe Lotha nungert tokteptsü.

Lok Sabha 2024 election atema Nagaland nung nomination meyipa agiba anogo tatembangbaji March 30, 2024

Honibarnü liasü aser tanü candidate shingaiia tenüng meyipa magi, ta Returning Office nung ketdangsur kati ashi.

INC candidate Supongmeren Jamir ya NPCC president lir aser pa ta taoba MLA ka lir. Pai tang mezüng atema Lok Sabha election nung tokteper.

NDPP candidate Dr. Chumben Murry ya opposition maliba People's Democratic Alliance (PDA) indang consensus

candidate lir. Pa ya State Assembly nung taoba MLA aser Minister lir aser tawa tashi Political Advisor to Chief Minister Nagaland inyaka liasü.

Independent candidate Hayithung Tungoe Lotha ya social activist, politician aser entrepreneur ka lir. 2019 Lok Sabha elections nunga pai National Peoples' Party ticket amer toktep saka tamakok angu.

Par asem rongnung Hayithung-i mezüng March 22 nü nomination asü aser iba sülen march 26 nung Supongmeren aser Dr. Chumben nati nomination süa liasü.

Nagaland nung April 19, 2024 nü Lok Sabha election agitsü.

2019 Lok Sabha election nung Nagaland nungi candidate 4 toktep aser idangji NDPP candidate Tokheho Yephthomi-i takok ngua liasü.

DIMAPUR AO BAPTIST AROGO HEALING MINISTRY TANEPTSÜ SENTONG

DABA Main Church nung April 3, 2024 anepdang 7:00 AM nungi sentong tenzüksü. Tamang agi nisung ajak arua adentsü pelashishia jaoker. Tsüngrem asoshi kecha tamakoktsü mali. Yisui la dang ashi "Tenü, ne tamang agi na junga kümogo... junga liang." Mark 5:34

Sd/-
Pastor, DABA.

Longleng & Mon nung polling ktdangsurtem training agiogo



(Abelen) Polling ktdangsurtem atema training mezüngbuba shilem tenzükba sentong nung DC & DEO, Longleng, Dharam Raj IAS-i o jembiba noksa nung angur. (Avchiji) Town Council hall nung tetsür polling ktdangsurtem training mezüngbuba shilem agiba mapang EAC Mon, Nyamok Konyak-i o jembiba noksa nung angur.

Dimapur, Metsüremi/March 30 (TYO): District Commissioner & District Election Officer, Longleng Dharam Raj IAS-i March 30 nü GHSS Bautung, Longleng auditorium nung taruba Lok Sabha election atema Longleng nungi polling ktdangsurtem asoshi training mezüngbuba shilem tenzüksüogo.

India amala democratic linük ka nung election inyakym ya kanga tongtibang ta shia DC & DEO-i, polling ktdangsurtem ajaki parnok nem lezmüksüba mapang tamakok maludaktsüi takok

ngua inyaktsü ta temulung lema bilemba lemsatap.

DC-i, vote asütsü temsüa alir ajak dang iba election nung shilem agitsü ayongzükba liasü.

Sentong nungsa Assistant Election Officer, Longleng-i, training nung shilem agirtem dang nüngdakba mapang nung Master Trainer tem teyari agitsü mepeshia metetdaksüba

den, parnok mapa tamakok maludaktsüi jet-jeta inyaktsü atema parnok tangatetba tajungba kümdaktsütsü asoshi ken o mangatetbatem jangjashitsü koda tongtibang iba indang lemsatap.

Training lapokba sentong ya EAC lenisüba nung agi aser training management Nodal Officer-i lokti pela agizükba o jembiba liasü.

Training ya session ana küma lemsar agi aser EVMs, VVPATs amshiba yimya sayuba sülen tembanga liasü.

Training tanabuba shilem April 9 nü agitsü.

MON: Taruba Lok Sabha General Election atema Mon District Polling ktdangsur tetsür aser teburtem ajak asoshi training mezüngbuba shilem GHSS Mon aser Town Council Hall, Mon nung March

30 nü agiogo.

ADC Mon, K. Temjennaro Longkumer-i training nung shilem agirtem ajak pela agizük aser polling ktdangsurtem shilem aser khuret indang metetdakja liasü. Laisa, training nung shilem agir ajak dang, "sorkar tenzükker ka ama ya asenok mapa aser asenok lenir shilemtsü asoshi iba ya maongka tajung ka lir," ta ashi.

Laisa, parnok dang election takok ngua agitsü atema team ka ama bendanga agüja inyaktsü ayongzükba liasü. EAC, Mon Nyamok Konyak-ia, tetsür polling ktdangsurtem

indang shilem aser khuret dak sendakba nung tangazükba agüja liasü.

Tetsür polling ktdangsurtem atema Mary, Opentsani aser Chenkang Konyak nunger master trainer liasü aser tebur polling ktdangsurtem atema Dokingla, Honya Chingyah, H. David Konyak, Neangnyu Konyak, H. Benjamin Konyak, W. Kawang Konyak, W. Bangkai Konyak, T. Limawapang, C.H. Manwang Konyak, Chingkai, Doklong M. Phom, aser Yangto nunger master trainer liasü.

Sainik School cadet temi Jalukie jila nung Assam Rifles semdang

Kohima, Metsüremi/March 30 (TYO): Sainik School Punglwa, Nagaland nungi cadet 104 aser staff aseme March 27 nü Educational & Motivational Trip ka ayongzükba agiba mapang Jalukie jila nung Assam Rifles Silver Battalion semdanga liasü.

Battalion semdangba mapang AR sepaitemi cadet tem pelashishia agizük aser

prangbong aser hadir balala indang parnok nem metetdakja liasü.

Cadet temi Pistol, Rifles, Machine Guns, Mortars aser Rocket Launchers tem densema Infantry weapon tem amshiba yimya angazükba liasü.

Kasa anogo telongjem aser tashi sayuba temaitsü arr atsütepba sentong ka ayongzükba asaya liasü.

Maneni cadet temi unit facility, line balala, mozüki aser unit indang school semdanga liasü. Cadet temisa battalion indang ktdangsurtem den sensaksema liasü, ta Ministry of Defence, Manipur, Nagaland and Southern Arunachal Pradesh PRO & otongdar-i sangdong ka ajanga metetdaksü.

NSDMA aser DDMA nati teyari agütsü



March 27 nü District Disaster Management Authority (DDMA) Peren den yimtsüng nung lenirtemi relief osettem lemtsüba mapang tangokba noksa nung angur.

Dimapur, Metsüremi/March 30 (TYO): March 26 nü tsüngsang mopung tamajung agi Nagaland aser talisa Peren, Niuland aser Phek district tem kongshia liasü. Yipru ajanga ki aser tsünusenpongtsütem raksatsü aser lendong nung nisungtema yiruba onsang angazükba liasü.

Lendong atalokba sülen Nagaland State Disaster Management Authority aser district balala nung District Disaster Management Authorities (DDMAs) temi talisa Peren district nung lendong agi kongshir aliba kibong aser lokti nem teyari agütsüogo aser kasa mapang nung Niuland aser Phek district nung yipru ajanga teraksatsüba bener arutsüba tang asadanga mapang lir.

District balala nung DDMA tem ajanga NSDMA, Home department-i tensa maneni asadanga atadar aser lendong agi kongshir aliba kibong aser lokti nem teyari agüja arudar.

Osang ajangasa, lendong agi kongshir aliba kibong aser lokti shirnok pei aliba tesem nung DDMA-i metongjemi ali parnoki tenüngdakba teyari agitsü atema circle Administrative ktdangsur den t o n g t e p r a t e p t s ü metetdaksüogo.

NSDMA-isa, taruba anogotem nung tsüngsang mepung tamajung nungi jenboa alitsü atema kümküma atatsü metetdaksüogo. Lendong tsüdong atalokra ajak kümküma alitsü aser DDMA tem nem takaratiba nung osang agütsütsü metetdaksüogo.

Peren district nung SAARTHI- Awareness sentong agiogo



ASHA Cordinator Peren block-i Kipeuzang yimtsüng nung FGD ayongzükba agiba noksa nung angur.

Dimapur, Metsüremi/March 30 (TYO): Peren district kübok Family Planning dak sendakba nung SAARTHI- Awareness on Wheels activity sentong March 11 nungi 26 tashi yimtsüng 16 nung ayongzükba agiogo.

Family Planning inyakym balala dak sendakba nung nüburtem nem tangazükba agütsütsü nükjidong nung iba sentong ayongzükba agiogo. Iba

sentong ya talisa mama yongdakja aliba tetsütem, kijung lanurtem aser mashisa aliba tetsürtem atema ayongzükba katsüogo.

Sentong nung shilem agirtem nem sorkari agütsüba health care facility balala, district, CHC, PHC HWC aser Sub Centre tem nung agütsüba service tem aser Family Planning kübok scheme balala

indang metetdakja liasü.

Sentong nung tanur kwi aginür aser tanur ka sor tanabuba tanur maso tsüngda condom, copper T insertion, aser contraceptive pills amala temporary method tem amshia koda azüoktsü iba indang tangazükba agüja liasü.

Beneficiaries tem dang family planning method ajak ya sorkar health care facility ajak nung angati angutsü ta metetdaksü.

Team yagi family planning inyakym balala dak sendakba nung tangazükba agütsü, family planning on choice dak sendakba nung Information Education and Communication (IEC) leaflets lemtsü, temsüa aliba apuani nem counseling agütsü, aser condom aser oral contraceptive pill agüja liasü.

Sentong nung IEC pamphlets 515 lemtsü, client 23 semdang, client 25 nem counseling agütsü, condom 325 lemtsü aser COC Cycles 139 lenja liasü.

FGD aser IPC ya IEC personnel tem, ASHA Co-coordinator tem aser Peren, Ahthibung, Jalukie aser Tening block ASHA temi achaayanga agia liasü.

केनरा बैंक Canara Bank **Premises & Estate Section, Circle Office, Guwahati, Dee Bee Grande, Panjabari Road, Six Miles, Guwahati-781022**
A Government of India Undertaking

ALIKI NÜNGDAKER

Teküboklen agüja aliba tesemtem nung Branch tasen ka lapoktsü atema 3-Phase Power load, parking space & water supply keter agitsü asoshi Ground floor nung aliba commercial space kiburtem atema jaoker.

BRANCH	DISTRICT	TALUK	STATE	CARPET AREA UP TO	Power Load
CHUMUKEDIMA	DIMAPUR	CHUMUKEDIMA	NAGALAND	1700 SQFT	25 KW

Osangtejangja Bank indang Website: <http://www.canarabank.com/tenders.aspx> nung agüja lir. Tenüngdakba application form tem aser corrigendum/amendments kar dangi lir ajitmalen shisema aliba office mesura Bank indang Website nungi download süttetsü. Form benoktsü atema tatembangbuba anogoji 20/04/2024 3:00 ako tashi asütsü.

Last date for submission is 20/04/2024 up to 03:00 pm.
Place: Guwahati
Date: 31-03-2024
+91 9572919282; 0361-2334020 (pecoguw@canarabank.com)

Sd/-
Assistant General Manager

India-i tangar dang nungi angazüktsü menüingdak: Jagdeep Dhankhar

New Delhi, March 30 (Agencies): Delhi Chief Minister Arvind Kejriwal apubada dak sendakba nung US, Germany aser UN-i India dang ochi temeden agütsütsü aser election timi agütsütsü benokba aija Honibarnü linük tatong Tir, Jagdeep Dhankhar-i, India ya nüchiso anguba linük ka lir aser judiciary tashi itta aliba linük lir, ta ashi.

New Delhi nung Indian Institute of Public Administration 70buba Founders' Day sentong nung jembidang Dhankhar-i, temzüng ozüing dak sendakba nung India-i tanga linüktem dang nungi 'lesson' menüingdaker, ta metetdaksü.

"Tawa kari asenok dang temzüng-ozüing dak sendakba indang ashir. Europe nung linük

ka, democracy terenlok aliba linük, parnoki parnok sasep atema dang bilemstüla. Parnoki parnok sasep nung dang inyaksüla," ta pai ashi.

"Tanü India nung tangatetba tasen kaji- ozüing tsüingdang ajak kasa, aser iba ozüingji ajanga ozüing alema inyakerem anema inyaker. Ajisüaka tanü asenoki kechi angur? Ozüing kübok tim teinyaksü inyakba mapang nung parnoki yimti-yimdong nung longkak aiter aser o toktepter. Iba ya asenoki ngua ataloker," ta pai ashi.

Linük tatong Tirisa, India nung judicial inyakyim tashi itta lir, nüburtem pusemba aser nija temeden aliba judiciary lir, ta metetdaksü.

India nung rejutem ilatsütsü merangba dak sendakba nung Dhankhar-i

register süa maliba yimtenren teloktem ashishiba den külemi yimtenren teladak asütsü ayongzük.

Alima sabang nung India-i tim shilem angutsüla, ta shia Dhankhar-i alima nung yimsüsüba tsütsülen India-i shilem agiba metetdaksüba den külemi United Nations Security Council (UNSC) nung India züingoktsüla, ta ashi.

Kasa sentong nung Dhankhar-i tawa yanglushiba Indian Institute of Public Administration (IIPA) semzüktsüba den külemi kaket aika sayaja liasü.

Iba sentong nung IIPA DG, Surendra Nath Tripathi aser IIPA Registrar, Amitabh Ranjan na densema tongti ketdangsertem aika densema liasü.

MOLUNGNEN O



Aso: Jan, 1930 - Asü: 22nd Mar, 2024
Asür Imnüsüngla

Onok temeim Ojala Imnüsüngla (Mangmetong) shiranga aser asüba mapang tashi, kija, kibong, Arogo aser lokti balala, tembartinurtem aser adianutem, pei nübo, sarasadem, rongsen, aser shisatsü agi ozü mangyim jashi nung yaritepogo, nenok ajak dang kanga pelaba lemsateper. Nenoki nungita yariba den onok azüing meyaka meyutsüba agi ozü mulong anisüngzüktsüo.

Nenok temeim mapa asoshi Tsüngremi maneni moajang ta ozü sarasadem.

-Temeim Chirnur, Anükapang aser Kinungertem

Tiri LK Advani densema nisung 5 nem Bharat Ratna award agütsü



March 30, 2024 nü Rashtrapati Bhavan, New Delhi nung Tir, Droupadi Murmu-i taoba mapang Ato kilonser ana- asür P.V. Narasimha Rao aser asür Chaudhary Charan Singh na den Agriculture scientist asür M.S. Swaminathan aser taoba mapang Bihar chief minister asür Karpooori Thakur nung nem Bharat Ratna award agütsüdang tangokba noksa nung angur. Asürtem nüngtem nung parnok kinüingertemi award agizük.

New Delhi, Metsüremi/ March 30 (Agencies): Honibarnü Rashtrapati Bhavan, New Delhi nung sentong ka nung Tir, Droupadi Murmu-i taoba mapang Ato kilonser ana densema nisung pongu nem Bharat Ratna award agütsüo.

Linük nung tematiba civilian award ji taoba mapang Ato kilonser ana- P V Narasimha Rao aser Chaudhary Charan Singh na den agriculture scientist, M S Swaminathan aser taoba

mapang Bihar nung kümsük (term) ana chief minister inyaksang, Karpooori Thakur nung nem agütsü. Parnok ajak süadokogo, ibayongji kinüingertemi sempetji agizükja liasü.

BJP lenir tain, LK Advani nembo iba sempetji par kidangi tsüingdong oa agütsütsü.

Rao, Singh, Thakur aser Swaminathan nung sempetji kinüingertemi agizükja liasü.

Taoba mapang Ato kilonser Rao indang sempetji par jabaso, P V Prabhakar Rao-i

agizükja liasü aser Chaudhary Charan Singh indang sempetji par semchir aser Rashtriya Lok Dal (RLD) Tir, Jayant Chaudhary-i agizük.

Swaminathan'er jala Nitya Rao aser Thakur'er jabaso Ram Nath Thakur nati par tsüraburtem indang sempetji agizükja liasü.

Iba sentong nungji linük tatong Tir Jagdeep Dhankhar, Ato kilonser Narendra Modi aser Union Home Minister, Amit Shah nung densema tongtibang lenirtem aika liasü.

Excise Policy nung kulisürtem aser BJP tsüingda tesendaktep lir: AAP

New Delhi, March 30 (Agencies): Honibarnü Aam Kejriwal pua liasü. Pa April 1 Aadmi Party (AAP)-i, Delhi liquor policy ken o nung kulisürtem aser Bharatiya Janata Party (BJP) na tsüingda tesendaktep lir, ta metetdaksü.

Honibarnü New Delhi nung party office nung osangbenertem senden ka nung AAP lenirtem aser Delhi nung ministers- Atishi aser Saurabh Bharadwaj nati, excise policy ken o nung Enforcement Directorate (ED)-i Magunta Srinivasulu Reddy'er jabaso Raghava Magunta Reddy pua liasü; BJP den tesendaktep aliba Telugu Desam Party (TDP)-i taruba Lok Sabha election atema pa candidate shimogo, ta metetdaksü.

AAP lenirtemisa ED dang iba dak sendakba ya bushisüingdangtsüla, ta tayongzükba agütsü.

Atishi-i, "ED-i parnok ya nija tashi aliba agency ka bilemra iba tesendaktep ya bsushisüingdangtsü onoki ED jazüker," ta metetdaksü.

AAP lenirtemisa, Maguntas densema kulisürtem kuli nung ajemdaker ED-i Delhi Chief Minister Arvind Kejriwal apu, ta metetdaksü.

Tamalen Delhi excise policy nung ochimashi liasü, ta tai tonglokja March 21 nü ED-i

AAP tongti aser Delhi CM, Kejriwal pua liasü. Pa April 1 tashi ED ket nung ayutsü.

Atishi-isa, kasa ken o nung ano kulisür ka, Sarath Reddy-i electoral bonds ajanga BJP nem sen crore 55 agütsüo, aser ibaji ajanga BJP aser kulisürtem tsüingda tesendaktep sayur, ta ashi.

Atishi-isa, Kejriwal anema kuli magütsü tashi ED-i kulisürtem reshikangshir, ta ashi.

ED-i Delhi Transport Minister Kailash Gahlot dang asüingdangyaba dak sendakba nung Atishi-i, ano maneni AAP lenirtem aika jaoka asüingdangyatsüa akok, ta ashi.

"Parnoki ni, Bharadwaj aser tanga AAP lenirtema jaoka aputsüa akok, ajisüaka jail-i aitsü atema onoki metsübur," ta lai ashi.

Kejriwal apuba ya democracy anema inyakba lir ta shia Atishi-i, INDIA bloc-i iba anema nokdaker ta ashi.

Ano külen tanga osang ka nung, Kejriwal apuba anema Amongnü (March 31) opposition INDIA teloktepi Delhi nung aliba Ramlila Maidan nung longkak aittsü. Iba sentong nungji AAP, Congress aser Trinamool Congress densema opposition party aikati shilem agitsü.



March 30, 2024 nü New Delhi nung Congress lenirtem- Jairam Ramesh, Arvinder Singh Lovely aser Deepak Babaria nungeri osangbenertem den jembidang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, MARCH (METSÜREMI) 31, 2024

Kechiba ajeper ?

Tanep ya asen Kibuba Yisu Khrista tasü madak takok ngur tasü nungi shia aruba anepdang lir. Anogo asem-pezüka jakdang Yisu dak amangertem aser pa den jajartem tetsübu aser maksü tia ajuruba tensa tia nungi takok ngur tejak tentetsüba anogoji ibai liasü. Aji oda, Yisu sülen anidakertemi Pa tanaben shia arutsüba dak amang asübo, ibai tepelatsü anogo ka asütsüba liasü. Ajsüaka, nütsüngtem shinga tetsübu agi kimai madok aser Mary Magdalene-a Yisu leper tsüngdang jepa liasü. Iba tetsür ya küm ana-semka jakdangbo temenen tanülai pur yira senzua aliba tetsür ka liasü. Asenoki la dak temenen tanüla tenet aridoktsüba otsü Luke tapu 8 tetenzüklen shia angutsü. Yisu shia aruba anepdang, ano züngia alidang iba tetsür ya Yisu leperi aoba otsü asenok Yohan tapu 20 nung shia ngur. Tetsür ka la kija anepdang ano mesangwadang leperi aobaji tasü tait aser tamang tulu. Ashiko, iba tetsürla ya Kibuba Yisu Khrista pua bener orr kangki nung angenlokba anogo nungi iba aonung tashi shisabolu aser tejashi agi amuia mouteti nükena liasü südi. Tangari Yisuji ozüng raksar aser alima yimten anema inyaker ama kümdaktsür ashir-auer den külemi kangki nung angenloka sūdaksü. Pa nem taku aser tasentsü jemdaksü aser atalatsü. Iba mapangjibo Yisu sülen anidaker shinga mali asü. Yisu yamaji timtemba mapang pai jungtsür aser pai aneptsürtem shingaia pa pu aseme maru. Anogo, shia nisung lokti tulu agi meketbanger Pa o angaa senzürtem shingaia Yisu leper semdangnua mait. Ajsüaka, Mary Magdalene-bo Yisu süadokaka Pa sülen anidak manen. Atangji, laia Yisu tanaben shia arutsü tabo mamang saka tasü leper tashi lai Pa medoktsü. Yisu sür leper nung rema lir ta lai metet saka iba mapangjia la asoshibo Yisuji la 'Kibuba' liasü (Yohan 20 :13). Lai la dak nungi Kibuba Yisui temenen tanüla tenet aridoktsüba anogo to jangjajangjaa bilemtet. La Kibuba Yisu sülen mapang tatsüka jajadang Pai nübortem dang sayatenya mapa inyakba mamai liasü. Kasa hopta tenzükdang lokti tului 'Hosana' ta ayimtena Yisu Khrista Yirusalemi aiba lenmang piyong agizükertem kasa nisungtem to agi Hopta atemdangbo " Pa kangki nung angenlokang' ta ayimtenba sülen, Yisu sülen anidaker kata mali ama kümer aliba mapang ka, Mary Magdalene-ibo Yisu medoktsü. Lai kodang leper nungi Yisu temang nisung kari auyaa bener ogo ta reprangtet, lai idangjisa Yisu nütsüng Simon Peter aser tangar nütsüngtem dangi orr osangji agütsü. Iba osangji angashia Peter den tangar nütsüng ka dena leper jagi asema ao saka kodang parnoki Yisu temangji leper nung mangu, parnokia paji tangari bener ao südi ta bilem aser parnokbo pei kidangi meyipa ao saka Mary Magdalene-i bo la kümzüksang, la nüji kümdaktsüsang Kibuba Yisuji kongka aliar memetet tashi leper toktsür mao. La yangji jepa nokdak aser jepjepa lai ano ken leper nungji anguoka reprangdang kotak tenyar ana angu aser kotak tenyar ana denji jembir tesülen meyip dang, la sülen Yisu nokdaka liasü. Idangji Yisui ashi, Tetsür, na kechiba ajeper (Yohan 20:15). Aji oda, Yisu tasü nungi shia arur külen mezüng Yisu den ajuruteplaji Mary Magdalene liasü. Mary Magdalene dak inyakba ama, Yisui asenok temenen talenba nungi nüchi kümdaktsü, shirangba aneptsü aser asen nungdak ajak moatsüogo. Ajsüaka, Yisui ashiba ama, Pa sülen Pa nütsüng kümer anidaktsübaibai temela masü. Kenkenbo asen kümtetdakba Kibur Yisuji asen den alir ajaki atalatsü mesüra tanidaker shinga melii akümtsüa akok. Aiben, asen yimtak, asen kiyong nung mesüra asen aliba town nung Yisu sülen anidaktsü arendakba aser tsüsuba purtem agi sünga alitsü akok. Iba ama mapang nung asenoka tamang nung tezüdanga adoktsüa akok mesüra tasü maittsüa akok. Ajsüaka, asen taküm nung teimla ajak samar Yisu-a mali ama bilemba tensa tia arudang, asenoki Mary Magdaleni anguoka reprangdangba leper tazüng nungji asenokia anguoka reprangdangtsübaibai mamatsüla. Leper tazüng tetezüji tasü madak takok anguba. Iba jagi asenok teti taküm tepeladak alitsüsa Yisu Khrista tebu dangi ogo ta jangjar. Iba jagi Pa tanaben asenok anii arutsü ta kuli sayur. Iba teimla nung asenok alitsü aser joko tasübaia asenok makoktsü. Yisu shia aruba osang tajungji ibaji lir.

OLEMSABANG

SHIA ARUBA KHRISTA (Yisu Tasü Nungi Shia Aruogo Ta Nai Kotaser Metet?)

- Rev.Prof. Rongsen

Pauli Korinti arogo dang tasür shia arubaji melira mesura teyazü sura sayutsüngitsü kecha nungdak maka, aser tamang ayutsüa kecha menungtak ta ashi. Ano shirnok tamale suogo, parnkjia tasüji tasü lir kechiyong tasür shia arutsü imlaba mali ta ashi. Ttezüji khristian tamang nung Yisu sur shia arubaji tongtibangtiba tamentakdak lir.

Iba onuk nung ya Yisu khrista alima rangpen asoshi pei taküm agüja meimchirtem tai temenen atokba tna lir. Ano iba onuk nung ya shirnok Yisu dak amanga asür parnokji Yisu shia aruba ama shia arutsü amangba tena lir.

Aji oda Yisu Khrista sur shia aruba melira tamangtsü menungtak, mission mapa tapu tapu inyaktsü menungtak aser aji oda arogo tenteta aotsüa menungtak. Kechiyong iba alima nung aliba taküm ya tatembang. Anungji tanü pei linutsü lia jangratema lira ojang.

Pauli Korinti arogo nung dang Yisu shia arubaji Pa dak amanga asürtem Pa shia aruba ama shia arutsü sayuba tamaittsü ta shia lir. Iba ama tesayuba ya yimsu tanga kecha nunga mali. Iba tesayuba ya ajanga Khristian yimsu ya tanga ymsu ajak dang nungi balaka ta sayur.

Saka tanü putu nung iba tesayuba anema tanga teyazü tesayuba tapu aika adoka nuburtem Talisa asen lanurtem mamakshishidaktsür. Item telok rongnung kaji Tsüngrm tak mamangertem aser Tsüngrm mali ta ashir telok (Ethiest) ya lir. Parnoki Tsüngrem lir ta mamanger. Alima nung nisung dang kibur aser nisungji ajak aser ajak ta parnoki amanger aser sur shia arua aliba lima kakecha nunga mali ta sayur. Parnoki asenok Khristiantem menuja Yisuji Tsüngrem sura koda sur nisungi tepsettet?ta jembir aser Yisuji sur anogo asemnu nung ang shia aru sura anogo asem nuji shibai Tsüngrem mapaji tongzüka ata? Ta asüngdang. Tsüngremji alika asünunga kodanga asütsü makok ta parnoki ashir. Anungji Yisuji Tsüngrem chir aser Pa tepseta sutaktsür anogo asemnu buba nung shia aru ta amangasayubaji tamamangtsü poratetba teyazü tesayuba lir ta parnoki jembir.

Khristan telok ka ama iba ama tesayuba atema asenok tsayuba kechi lir? Asenoki arogo aser kibong nung tsayuba shitak magütsütetra iba ama tesayuba yagi asen lanurtm aika anisatsü.

Yisu Khrista taküm, mapa aser Pa dak atalokba maparen tak mamangba telok tanabubaji Yihuda nungertem lir. Iba telok yagi Yisuji Messiah masü, Pa asübaji alima temenen atema masü, Pa sur shia arubaji shitak aser meshidak ta jimbitsü kecha tenungtaktsü mali ta ashir. Tsüngremji ana-asem masü, saka yangpong ka dang lir. Anungji yisuji Tsüngrem masü aser Tsüngrem Chira masü, saka nisung ka dang liasü. Yisu dak amanga pa indang zülua jembibaji pa nutsüngtem purapujiba mapa dang lir. Iba ama jembia sayur telok asoshi arogo aser kibongi lai nungi kecki tesayuba agütsütsü? Asenoki asen teinyaktsü tim yakta meinyakra asen lanurtem iba ama mopungsem agi kongshitagi.

Yisu Khrista tak mamangba telok tasembubaji Muslim nungertem ya lir. Au parnoki yisuji ainakar ka liasü ta agizüker. Saka ainakar Mohammad dang tilaba. Parnoki Yisuji Tsüngrem chir ta magizüker. Yisuji nisung ka dang saka ain aketba nisung ka liasü ta parnoki amanga sayur. Yisuji Tsüngrem masü ta amangba nungji Pai alima temenen asoshi pei taküm tenla agüja menenpur dang temenen tai atokba magizüker ta sayur.

Ano Muslim nung kari Arimathea nung Josephi yisu kangki nungi agizükdangji yisuji masü liasü. Anungji parnoki Yisuji yaria shia arudaktsü aser India lima tashi arur tesülen asü ta jembir. Iba olulu jagi Yisuji masü, anungji shia arubaji teyazü ta sayunuba liasü. Ano parnok karibo Tsüngrem ain agi Yisu melen tangar nisng ka ang sudaktsü aser paji yisu mesuka ngudaktsü ta ka jimbir. Iba olulu jagia Yisuji masü, anungji shia arubaji puratetba otsü ang ka lir ta ashir. Item amala tiyazü tesayuba anema arogo aser kibongtemi lai nungi kechi telangzüba agütsütettsü?Iba ama tesayubatem jagi asen lanurtem aika mangmangdaktsütagi.

Ano laishiba nung yamai shia lir - (Mt. 28: 11 - 14) Yihuda nung Yisu phua tepseter rogotemi Yisu tasü mangji aongnung tanükertem amoa or külen Pa nutsüngtei auya bener ao ta shishidaktsü. Saka iba teyazüji temenunutsü aser tamamangtsü o liasü. Iba ama Khristan tamang raksatsütsüba olulu anema arogo aser kibongi asen lanurtem nem kechi tesayuba agütsütettsü?

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Impur nung sarasadem sentong ka agi



Impur, Metsüremi/March 30 (TYO): Alongchen Baptist Arogo Women Ministry-i sarasadem sentong ka Good Friday anogo (March 29, 2024) nung Impur nung tongtibang tesemtem nung oa sarasadema kanga temoatsü ngua agiogo, ta Alongchen Baptist Arogo nung APW, Wt. Awala-i sangdong ka ajanga metetdaksü.

Iba sarasadem sentong ya tanü asen tamang anokshitsüsa amokmeren O balala angashiba mapang ka nung, Yisu Khristai Kangki nung taküm bendanga agüja asenok kümzüka tashi ajanga asen tamang manokshitsü, ta amanga tamang akhangshiba sarasadem agiba liasü. Iba sentong nung Wt. Narola Walling, Chaplain

Impur Christian Hospital ajanga tanü tensa nung tetsür ka shilem nung ajemdaker tayongzüka tulu agüja kanga temoatsü ngua agia liasü. Asenoki tamang tongpang nung tezü medangi sarasadem nung tashi tulu alinung sarasadem medangdangi agir tamangertem südi, ta kasa sangdong ajanga mepishia metetdaksü.

Nicaragua nung US ministry ka nung inyaker pastor 11 aitsü



Court-i aitsüba Nicaragua nung pastor tem noksa nung angur.

March 30, 2024: Nicaragua linük nung court kati US nung amenoka aliba Mountain Gateway ministry ka den sendaktepa inyaker Nicaragua nung pastor 11-i senotsü dak sendakba nung ochimashi mapa inyakogo, ta aitsü. Kasa ken o nungsa US senso asem nem-a tai tonglojka lir, ajisüaka tang tashi nungbo parnokbo mapu. US nungi Nicaragua dangi senotsü yokba tsütsü ochimashi lir, ta tai tonglojka liasü. Mountain Gateway ministry-i Nicaragua linük nung ayongzüka agiba evangelistic sentongtem aika nung nisung million 1 dak tema adenba sülen sorkari Khristantem anema inyaker. Managua nung aliba Central Judicial Complex nung pastor tem anema ken o angadamba sülen temerenshi obendang agütsü. January 17, 2024 nü Nicaragua nung US senso asem aser Nicaragua nung pastor 11-i senotsü tsütsü ochimashi inyakogo, ta tai tonglojka liasü. America nung asem- John

Britton Hancock, Jacob Britton Hancock aser Casandra Mae Hancock nungeri US nungi aruba sen agizüksü atema Nicaragua nung Mountain Gateway Ministry kongsang lapok, ta parnoki metetdakja liasü. January ita nung osangbener den jembidang Mountain Gateway otongdar Steve Lisby-i, "Tai tonglojksüba ken otem tamendakdakji shidak masü. Senotsü amshiba dak sendakba inyakyim shidak onoki benshiogo. Onoki Nicaragua nung meimba agi iba linüki aru aser onoki parnok den Yisu indang lemsatepner," ta metetdakja liasü. Ministry-i, iba ya tamangba yimsü aser yimtenren tsütsülen nungi reshikangshiba lir, ta shia international human rights organizations aser U.S. State Department dang tiyongtsüi aita inyakdaksüner, ta mepishio. Pastor 11 anema obendang agütsüba sülen Khristan legal defense organization ADF International-i, parnoki iba ken o ya Inter-American Commission on Human Rights

matsüngdang benoktsü, ta metetdaksüogo. "ADF International-i iba ken o nung Mountain Gateway pusemer aser tiyazü nung aija alirtem tenü nung Inter-American Commission on Human Rights matsüngdang ken o benokogo," ta ADF International-i sangdong ka ajanga metetdaksü. Nicaragua nung Tir, Daniel Ortega-i aniba sorkari, 2018 küm nüburtemi longkak aitba aser Tir menden nungi pa atsüngdoktsü merangba nung Khristan putirtemi shilem agiogo, ta tai tonglojka linük nung Arogo anema inyaker. 2018 küm nüburtemi Ortega Tir menden nungi anentsü takhangba agüja longkak aitba sülen nungi sorkari parnok anema ola adokertem aser Arogo lenirtem anema inyak tenzüka liasü. Nicaragua nung Ortega-i aniba Sandinista National Liberation Front sorkari Mother Teresa's charity densema melungtet telok 3,000 dak tema anentsüogo.

ANOGO ABEN TSÜNGREM DEN

TATITANG MADAK TAKOK

Shibai tatitang aremzüker pa temoatsüba, kechiyong pai tatitang koker külen, taküm korang, koba Kibuba dang meimertem nem agütsütsü pai nangzük, aji pai angutsü.

~ Yakob 1:12

Tsüngremi yangluba meimchirtem shingaia tatitang majurudang mesüra majurutsü ta mali, akidang Adam aser Eva nungi tetendangba mesüra tatidang ajuru, tanü asenoka tatitang agi mekütpanga lir. Aikati tatitang mokokteti pei taküm, kibong aser lokti asoshi takoksa, maksü aser tesama tashi ajurua aruogo aser ajurur. Kechi tatitang ka asen dangi arur iba nem kokdaksüra iba larji akümer. 2 Peter 2:19 nung ashir, Parnoki parnok dang nüjiba nangzüker, saka parnok pei sasa teraksa lar lir; kechiyong kechi agi nisung ka akoker, iba lar pa akümer.

Alima nung temenen yimya aika lir, itemji nüktapangta, asüaküm, ochi mashi, rongsen benbuba, tenükmerem ano aika koba temenen yimya asen dak lir shisadangi. Asen dak Tsüngremi memulungba koba agi temenen mojing peladaksür iba yimya kar danga asen dak lia iba nem yimsü sädakja lira asen dangi takoksa tulu arutsü. Khristan ka ama temenen tasa meteta tatitang ajak kokteta temoatsü taküm ka kuma kuli tajung bener taküm korang koba Kibubai meimchirtem nem ?agütsütsü nangzüka lir, ibaji ngutettsüsa Pa dang tsüngchir süa amangdi.

Easter tekülem sentongi aoer Khristan 45 gari lendong nung asü

March 30, 2024: South Africa nung Khristantem telok ka Easter tekülem sentong nung adentsü atema aodang gari lendong ajurua Khristan 45 süogo. South Africa Tir, Cyril Ramaphosa-i sangdong ka ajanga, Khristantem telok ka Botswana nungi Moria yimtii aoba mapang nung Mokopane anasa tsükok, ta metetdaksü. South Africa Department of Transport-i X ajanga, "Brihostibarnü bus nungji nisung 46 aoba mapang tsükok aser iba lendong nungji nisung ka dang kümzüka," ta metetdaksü. "Bus anisang jagi gariji mazüokteti apu tezülen tsükoktsü aser bus nungjagi mi adok," ta parnokisa metetdaksü. Limpopo Department of Transport & Community Safety-i sangdong ka ajanga, "Iba lendong nungjagi arrshi küm 8 tetsür chanu ka dang kümzüka. Tasü mang karbo mi

agi mejungi rongsaba agi maitüsü mejangjar," ta metetdaksü. South Africa nung Easter sentong tulutiba nung adentsü atema Khristantemji Moria yimtii aiba mapang nung iba lendongji atalok. Linük nung Easter sentong tongtiji Zion City Moria nung aliba Zion Christian Church nung agir. South Africa nung küm shia Easter mapang nung temeshi aini aoer Khristan million 3 nungi million 5 shii Moria semdang. Hokolbarnü South African Police Service INTERPOL National Central Bureau office-i sangdong ka ajanga, bus nung temeshi aini aoer ajakji Botswana nungi liasü, ta metetdaksü. Passenger 46 nungjagi tasü mang 34 ngutetogo saka nisung 9 maitüsü dang jangjar aser iba lendong nungi kümzüker tetsür chanu kaji hospital nung yaridar.



March 28, 2024 nü Rome yimti tezülen temeshi hopta dak sendakba nung Pope Francis-i Rebibbia jail nung puoka alir tetsür 12 tetsüng shidoktsüdang tangokba noksa nung angur.

AO OSHI ANGAZÜKDAK:
TANÜ ANGAZÜKTSÜBA OJANG



Süjak

(n) tebur pei oset nembangba sü, langtem (loin cloth)

* Tang tashi Naga nunger karbo süjak agirtem lir.

Süjen

(n) sü tejen (rags)

* Gari yanglushidak süjen kanga nungdaker.

OLONG PAITEP # 6742

	1		2			3		4		5
6								7		
					8		9			
			10							
11										
				12						
13		14		15						16
17								18		

TIPIEN

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S ____ - (4)
- 13. Yagi ajak ashioktsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. ____ hi - (3)
- 16. Akümüli nungi pilar - (3)

OLONG PAITEP # 6740 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

NAI-A YA METETTER MA

Elections nung Nominations 239 asüba nisung



Tamil Nadu nung Independent candidate K Padmarajan-i alima otsü tasen ka yanglutsü meranger. Lok Sabha elections 2024 nung Padmarajan-i Dharmapuri Lok Sabha menden nungi tokteptsü aser pai tan agi nominations 239 süogo. Tesüiba nung pai taoba PM Atal Bihari Vajpayee, LK Advani, DMK tanishir Karunanidhi, AIADMK tanishir Jayalalithaa aser BS Yediyurappa nunger den-a toktepogo.

"Tang tashi nung ni nominations 239 süogo. Ni tamakok dang aginür. Ni elections nung toktepba ya world record ka angutsü atema lir. Ni votes teimtiba angubaji election ka nung votes 6000 anguba liasü" ta K Padmarajan-i ashi.

Arishi küm 65 tain tyre repair shop kibur Padmarajan dang 'Election King' ta ajar aser 1988 küm pa tasodak Mettur jila nungi pai mezüng atema election nung tokteptsü tenzüka liasü.

Tripura Bar Council-i taila lawyers putettsü mapa inyaker



Guwahati, March 30, 2024

(Agencies): Tripura Bar Council (TBC)-i taila lawyers jangjatettsü atema survey ka agitsü aser state nung legal system nungi taila lawyers agientsü.

Onoki Tripura nung bar

associations ajak den tongtepogo aser 1990 sülen law degrees anguba lawyers tenüngtem meshiogo ta Tripura Bar Council züngsem kati ashi.

aila lawyers aika lir aser parnokki ochimashi ajanga degree angu aser Bars nung

register süa lir ta nisungtemi tebilemstütem lemsatepba sülen iba survey agitsü.

April 15 tashi nung bar associations ajaki tenüng agütsütsü aser iba sülen verification process ka tenzüksü.

Tripura Bar Council-i taila lawyers anema mapa inyakra ya tang mezüng masü. Tesüiba nunga TBC-i iba mapa inyakdanga liasü saka identification process metembangtet.

Tripura nung fake lawyers putetba sülen parnok Bar Council Roll nungi tenüng agientsü aser Advocates Act, 1961 kübok temerenshi alitsü ta osang angazüker.

Manipur nung LS candidate 11 lir; Arambai Tenggol-i tetuyuba agütsür

Imphal, March 30, 2024

(Agencies): Manipur nung 2-Outer Manipur (ST) Parliamentary Constituency atema tanü nikongdang 3:00 ako nung nominations meyipa agiba mapang temogo.

Iba mapang tashi nung candidate shingai tenüng meyipa magi aser 2-Outer Manipur (ST) Parliamentary Constituency atema candidate ajak agi 4 lir.

Parnokki Alfred Kanngam S Arthur (Indian National Congress), Kachui Timothy Zimik (Naga People's Front), Alyson Abonmai (Independent) aser S. Kho John (Independent) nunger lir.

Indian National Congress candidate Alfred indang election symbol ji 'Hand', Kachui indang symbol ji 'Cock', Independent candidate Alyson indang symbol 'Diamond' aser S. Kho indangs symbol ji 'Trumpet' lir.

Külen 1-Inner Manipur Parliamentary Constituency atema tanü nominations agütsüba tatembang anogo liasü.

Lamphelpat, Imphal West nung aliba Returning Officer tsüngdang candidate 7-i 18 buba Lok Sabha General Elections, 2024 nung tokteptsü atema tenüng agütsüogo.

Iba Lok Sabha constituency nungi candidate temji Party of India Athawale (RPIA) nungi Maheshwar Thounaojam, Bharatiya Janata Party (BJP) nungi Thounaojam Basanta Kumar Singh, Indian National Congress (INC) nungi Dr. Angomcha Bimol Akoijam, Rashtriya Janhit Sangharsh Party (RJSP) nungi Moirangthem Totomshana Nongshaba, Universal Family Party nungi Ngasepam Nilakanta Singh aser Independent candidate Haorongbam Sarat Singh nunger lir.

Manipur Meitei nunger telok Arambai Tenggol (AT)-i April 19 aser April 29 anogotem Lok Sabha elections atema tenokdangba kar agütsüogo.

Manipur nung election campaigns nung extravaganza madentsü ta Arambai Tenggol

Control Room Operation nungi Saishram Robertson-i metetdaksü.

Election campaigns nung loudspeakers mesüra sound amplifiers amshiba ajanga noise pollution agütsür anungji ibala oset mamshitsü ta Arambai Tenggol-isa metetdaksüogo.

Maneni, political party aser candidate temi party/candidate flags mamshitsü atema parnokisa tetuyuba agütsü.

Manipur nung political party aser candidate temi door-to-door campaigns, political meetings, aser rallies magitsüla ta Arambai Tenggol-isa metetdaksüogo.

Parnokisa voters dang election campaigns tenüng nung candidate dang nungi sen meshir benjung tulu nung shilem magitsü tetuyuba agütsüogo.

Manipur nung Lok Sabha menden ana lir- ka scheduled tribes atema lemsüktsüba Outer Manipur Parliamentary constituency aser ka Inner Manipur Parliamentary constituency lir.



Assam kübok Hojai nung drugs shibelener ana apuba angur. Murajhar police-i Pub Samarali yimtsüng nung tena apu aser tena ket nung bena aliba drugs ji Rs 42 lakhs alang liasü.

US-i Israel nem bomb aser jet agütsütsü agizükogo



President Joe Biden & Israeli Prime Minister Benjamin Netanyahu

Washington, Metsüremi/ March 30 (Agencies): United States-i USD billion aika alang bomb aser fighter jet tem Israel nem agütsütsü atema agizükogo, ta Washington Post sangdong ka ajanga metetdaksü.

Israel-i Gaza kübok Rafah yimti makra iba tesem nung civilian tem timba asütsü ta süokia bilemba yimjak nung lemsatapa aruba mapang ka nung tang iba temelaba ya agütsüo.

Arms package tasenba nung MK84 2,000-pound bomb 1,800 dak tema aser MK82 500-pound bomb 500 densema lir, ta Pentagon aser Department of State ketdangsürtemi ashiba Washington Post sangdong ka ajanga Hokolbarnü metetdakja liasü.

Pound 2000 bomb, koba ajanga süklep 1000 telungtet nung aliba nüburtem yirutsütsü koka lir, iba bomb ya Gaza nung taoba mapang nisung aika tepsetba nung Israel nung sepaitemi amshia arudar, ta kasa sangdong ajanga metetdaksü. US-i Israel nem kümshia USD billion 3.8 alang military dak sendakba nung teyari agüja arudar.

Washington nungi Al Jazeera indang osangbener Kimberly Halkett-i ashiba agi, bomb aser fighter jet tem ya USD billion 2.5 alang asütsü. Paisa, Israel aser US sorkar na tsüingda onük kar nung mangatetep adoker lir ajisüaka tang iba jenjang ya agiogo, ta

shisem. Gaza ita pongu tashi kecha taochi makai amakba ya anentsü atema US-i maneni Israel nongshidar, ajisüaka parnoki maneni prangbong injang aser hadir balala agüja arudar. Hombarnü Gaza nung tangsa tang ceasefire benoktsü aser tepuokertem chioktsü atema khanga United Nations Security Council bangzüng ka benokbabo US-ia tenokdangba magütsü agizükdaksüo.

Washington-i Gaza nung rara ya tajemba küm daksütsü atema nongshia arudar, ajisüaka parnok inyakyim ajanga osang tanga ka agütsür, ta Hamad Bin Khalifa University nung Middle East studies indang associate professor Marc Owen Jones-i Al Jazeera dang ashi.

Washington densema linük balalai aija aruba mapang ka nung Israel-i ashiba agi, parnoki Gaza Strip anüolen tip nung aliba Rafah amaktsü ta shiogo. Iba yimti ya Egypt den arrtsü nung lir aser Palestine nung tesem balala nungi rara ajanga jenshia aoer million 1.5 shi iba yimti nung jenoka lir.

Kasa mapang nung US senator temi Tir Joe Biden dang Gaza nung alirtem nem humanitarian teyari magütsü tashi Israel nem military teyari agütsüba ajemshitsütsü shiogo.

Linük aser rights telok aikati, International Court of Justice tetuyuba sülen tashi anga anidaka Gaza kong ayawara tenzükdar, iba tesem

asoshi teyari agütsü daksütsü atema Israel ayongzükogo.

US Senator Bernie Sanders-i iba jenjang agiba ya aitsüo.

"US-i Israel Ato Kilonser Benjamin Netanyahu dang künü civilian tem dak bomb pokloktsüba anenang ta ashitsü aser tasügnü 2,000-pound bomb meyirejang aika yoktsü ta mesütetsü," ta pai X sabang ajanga ashi.

"Israel nem bomb ojang dang agütsütsüla," ta paisa shisem.

Jordan indang Foreign Minister Ayman Safadi-i, alima kintem dang Israel nem prangbong injang aser hadir balala ojang dang agütsütsü ayongzükogo.

"US agency temi Gaza nung timtem tekangshi balala indang otsü shia arudar. Nisung 30,000 dak tema tepsetogo. Nisung million ana dak tema ya tzüra agi menepogo. Iba ajanga alima mak sūdaksür," ta pai ashi.

"Prangbong injang aser hadir balala Israel ket metongdaksütsüla. Iba rara ya kangshia anendaksütsüla. Iba ya international temzüng ozüng aser meimchir inyakyim takhangba lir," ta pai ashi.

Bomb aser fighter jet agütsütsü atema temelaba agütsüba dak sendakba nung White House-i kecha telangzüba magütsü.

Biden-i Hokolbarnü, Gaza nung rara ajanga Arab American nung er aika temulung zürepba angateter ta ashi. Israel Ato Kilonser Benjamin Netanyahu den yimjak nung aiben mangatetep adokaka pai Israel nem maneni teyari agütsütsü ta shiogo.

Washington-i Security Council vote nung shilem magütsü atema telemetba agiba sülen, Rafah nung operation dak sendakba nung Israel-i sentong yanglur aliba sensak asemtsü atema US aser Israel nung ketdangsürtem senden ka amentsü sentong yanglur aliba Netanyahu-i thijsa liasü.

Office of the Longmisa Senso Mungdang P.O.Mokokchung-798601. B.P.O. Longmisa Mokokchung :Nagaland. TENÜNGSANG AGÜTSÜR

Kr.IMTIKUMLA LEMTUR D/o Wb. Chubatoshi Lemtur aser Wt. Mayangnaro. Nagaland University kobok M.Sc. (Ag) Rural Development & Planning (2020 – 2022 batch) nung mezüng jenjang (Gold Medal) ngutetba asoshi L.S.M. ajanga tenüngsang tetushi agütsür.

Tarutsü anogotem nunga maneni Tsüngremi takok moajang ta sarasadema atar.

Sd/- Yashiramok Ao President LSM



Sd/- Watitoshi G. Secretary LSM

N Korea nem tenokdangba agütsütsü atema UN bangzük ka benokba Russia-i nokdang

New York, Metsüremi/March 30 (Agencies): United Nations Security Council (UNSC)-i tenokdangba agütsür aliba anema North Korea-i inyaksangshiba bushisüngdangtsü atema mongintemi tetetba independent panel ka asüngsashitsü asoshi bangzüng ka benokba Russia-i pa indang veto tashi amshia Brehostibarnü United Nations nung iba bangzüng nokdangogo, ta CNN sangdong ka ajanga metetdaksü.

Ukraine nung mangatetep adoker aliba dak sendakba nung Moscow aser anüolen aliba linüktem tsüingda tensa mejungi küma aoba mapang ka nung tang Russia-i iba jenjang ya agiogo, kechiyong North Korea ya Russia nem prangbong injang aser hadir balala agütsür rongnung tongtiba kümogo.

North Korea-i kümtem tsüingda United States tonga khatettsüba long-range intercontinental ballistic missiles densema ballistic missile balala tendanga arudar, koba US bangzüng anema lir aser ibayongji UN-i maneni bushisüngdang süner.

Taoba mapang Alima kintemi North nem tenokdangba agütsüba aser UN-i ozüng alema inyaksangshiba weapons programme tem bushisüngdangba mapang Russia-a pusema aruogo, ta CNN-isa metetdaksü.

Form No. INC-19 Metetdaksür [Pursuant to rule 22 of the Companies (Incorporation) Rules, 2014] 1. Companies Act, 2013 Section 8 aser Companies (Incorporation) Rules, 2014 dak ajemdaker Regional Director, North Eastern Region, at 1st floor, BSNL Bhawan, Pan Bazar, Guwahati 781001 nem Companies Act, 2013 Section 8 kübok Kohima Cricket League-i bena aliba surrendering license/ conversion atema application agütsüba metetdaksür. 2. Company indang principle objects temji yamai allü: cricket densema asaya balala terenok atema teams/players tem establishing/forming/ managing/ sponsoring asoshi aser company-i formed/ sponsored/managed asüba players/teams dak sendakba nung asaya azüoktsü aser achayangtsü atema formulate/ make/amend aser/mesura rules & regulations benoktsü atema: Intra-State, National aser/mesura International densema jenjang balala nung category balala atema asaya, tetoktepa, championship, events aser/mesura asayamungtem ayongzüksü/sponsor/publicize/broadcast asütsü atema: Saisapong ajak nung asaya ajungkettü atema Trainers, Coaches, tesayurtem anisemtsü aser kasa atema tenüngdakba facility tem achayangtsütsü asoshi aser asayar tajungtem anitettsü/ ajungmesotsü aser ken o kar nungbo asayarterm scholarships, sponsorship, service engagements & monetary benefits anepalutsü aser Cricket densema asaya balala inyakyim aser/ mesura integrity wazüka toktsütsü aser/mesura asaya balala nüjiso atema. 3. Company indang memorandum aser articles indang copy ka Registered Office at Nandi House, H.No. 7 Kharmaha, Dimapur, Nagaland-797112 IN aser/ mesura iba indang corporate office at 18th Floor, A-Wing, Marathon Futurex, N. M. Joshi Marg, Lower Parel, Mumbai 400013 MH IN nung angutsü. 4. Iba application anema nokdakba person, firm, company, corporation meura body corporate tem dang tashishiba kar lira Regional Director, North Eastern Region at Guwahati nem iba osang sangdongba sülen anogo semer tsüingda Regional Director, North Eastern Region, at 1st floor, BSNL Bhawan, Pan Bazar, Guwahati 781001 dangi abentsü metetdaksür aser iba indang copy ka company dangi parnok indang Registered Office Address at Nandi House, H.No. 7 Kharmaha, Dimapur, Nagaland-797112 and/or its corporate office at 18th Floor, A-Wing, Marathon Futurex, N. M. Joshi Marg, Lower Parel, Mumbai 400013 MH IN nem agütsütsüba. Dated this 28th day of March, 2024 For Kohima Cricket League Sd/- Anil Abasaheb Chougule Ajit Narayan Shelar Director Director DIN: 03494796 DIN: 10212541

Haiti: Jimmy-i sorkar tasenba atema sensaksem nung shilem aginer

Port-au-Prince, Metsüremi/ March 30 (Agencies): Haiti nung ozüng alema inyaksangshiba lokti tentet balala lenirtem rongnung ajak dang tashi taitba kati, sorkar tasen ka amenoktsü atema sensaksem nung telok (armed group) balala nem shilem agidaksüra parnoki prangbong hadirtem toktsür bendanga agütsütsü atema asadangtsü, ta shiogo.

Jimmy Chérizier, shiba dang Barbecue ta ajar, pai aniba teloktemi linük yimtiba Port-au-Prince kübok tesem timba ka aziüoka lir.

Paisa, Haiti kong taoba hopta ishika tsüingda

mepetmesü tulu adoka arudar, iba ya tamajungba küma aotsü akok, ta shiogo.

Ajisüaka pai Sky News dang, " ken o bentettsü atema onok renema lir," ta ashi.

Haiti ya Caribbean nung sensaker linük ka lir, kong nütsünyongsük million 11 dak tema lir. Iba linük nung March 12 nü nungi Ato Kilonser ka mali.

Ozüng alema inyaksangshiba telok balalai Ariel Henry Kenya nungi meyipa marudaksüi nokdanga ayuba sülen pai Ato Kilonser mapa toktsü. Linük nung temzüng ozüng aziüoktsü atema pai Kenya nung oa military

peacekeeping force ka anir arutsü atema tenangzüktepa ka yanglua liasü.

Caribbean linüktem aser US-i teyari agüja Haiti nung maneni democracy yimsüsüba amenoktsü atema Presidential Transitional Council ka amenokogo.

Chérizier ya Viv Ansanm (Live Together) ta nungja agütsür ozüng anema inyaksangshiba telok balalai tentetba telok ka nung ajak dang tongtibangba lenir lir, pai tarutsü nung sensaksem kechisa agidir agiaka idakji parnok telok nema menden ka mekazüka toktsütsüla ta bilemer.

Paisa Sky News dang ashiba agi, "alima kintemi sentong tejangja ka yanglua bener arura ajak ajurutepa sensaksemettsü, saka onoki kechi telemetba agitsü ali ibaji parnoki mazuoktsüla, ajita süra prangbong hadirtem toktsütsü akok."

Paisa, Haiti nung azütokshi lendong ataloker aliba ngua pa nemadanga mebilerem ta ashiba den, ochi mashi yimden yimsüsürtem anema nokdakba iba amala teloktem taruba sorkar atema sensaksem nung shilem magidaksüra tensa tamajungba akümtsü, ta tekümdangtsü metetdaksüo. Maneni pai, linük nung

security akangshitsü atema Kenya nung sepaitem arura parnok ya yim-makertem ama züngshitsü, ta ashi.

United Nations-i ashiba agi, Haiti nung 2024 küm tenzüker mezüngbuba ita asem nung nsung 1,500 dak tema tepsetogo aser nisung 800 yiruogo.

Kasa mapang nung teyari agütsüba lokti tentet balalai linük yimtiba chiyongtsü aser tajemtsü tzü bener aitsü tetsükdaksü ajangshiba lemsatepogo aser ashiba agi nisung million aika libaliro nung kongshioigo aser karbo yatziüra agi meneptsü ana nung lir ta tekümdangtsü metetdaksüo.

Miami Open: Sinner aser Dimitrov na Final asayatsü



Dimitrov

Sinner

Metsüremi/March 30, 2024 (Agencies): Italy nunger asayar Jannik Sinner-i Hokolbarnü Miami Open tebur kija asaya nung taoba küm iba asayamung koker aliba asayar Daniil Medvedev koka final-i iogo.

Semifinal asaya nung Sinner-i 6-1, 6-2 agi Daniil Medvedev ayong ayonga koka liasü aser pa final Grigor Dimitrov den asayatsü.

Tanga semifinal asaya ka nung Bulgaria nunger asayar Dimitrov-i 6-4, 6-7 (4/7), 6-4 agi fourth-seeded asayar Alexander Zverev koka liasü. Pa tang agi tasembenbuba Masters 1000 series final tongtetogo.

Iba asaya akokba sülen Dimitrov ya ATP rankings nung 2018 küm sülen tang mezüngbuba top ten-i aitsü.

Ajisüaka final asaya ya

Sinner-i akoktsü imlar, shibai pa tashi aser tasa tajung amshia Hard Rock Stadium nung Medvedev ayong ayonga koka liasü.

Italy nunger asayar ya taoba küm Miami tebur kija asaya final nung Medvedev-i tsükdakja liasü, ajisüaka taküm January ita Australia Open final nung set ana mekoki aliba nungi meyipa arur pai Medvedev kokogo.

Asaya nung mezüngbuba set nung Sinner-i Medvedev indang mezüngbuba service game koka 2-0 agi tejkadang aküm. Iba sülen ano pai game pezübuba nung Medvedev indang serve break asü aser asaya koka liasü.

Tanabuba set nunga Sinner-i Medvedev indang mezüngbuba service game break asü aser mapang tatsüka tsüngda pa 4-1 agi tejkadang akümba sülen asaya koka liasü.

Sinner aser Medvedev na mezüngbuba asaya trok tashi Sinner-i makokba sülen pai tesüsabuba asaya pongu atonga kokogo.

Tanabuba semi-final asayabo kanga toktepa asayaogo aser Dimitrov shibai semi nung Carlos Alcaraz tsükdakja liasü, pai mezüngbuba set nung Zverev indang serve ka break süa pa 5-4 agi tejkadang aküm aser pai asaya akok.

Tanabuba set nung Zverev-i asendenshir kanga junga asaya aser tie-breaker asayatsüsa aküm koba Germany nunger asayar yagi 7-4 agi koka liasü.

Deciding asayaba mapang Dimitrov-i game tenetbuba nung Zverev indang service break asü aser pai asaya 6-4 agi koka liasü.

India T20 World Cup squad April tatemi sangdongtsü imlar



Metsüremi/March 30, 2024 (Agencies): USA aser West Indies nung asayatsü aliba India T20 World Cup team nung asayar 15 ya April tatemi sangdongtsü imlar, kechiyong team benoktsü atema tatabangbuba anogoji May 1 lir, ta BCCI source kati metetdaksü.

Asayamung nung shilem agitsü aliba team ajak nem May 25 nü tashi nung mezüngbuba team nung asayartem melenshitsü atema maongka agütsütsü.

"India team April ita tatabangbuba hopta nung shimtsü aser iba mapang tashi nungbo IPL tesadangbo asayar alitsü aser national selection committee nem asayar tajungtiba shimtsü asoshi

maongka agütsütsü," ta BCCI ketdangsur tejen kati PTI dang ashi.

"Cricket asayartem mezüngbuba telok May 19 nü Indian Premier League (IPL) league stage tembangba sülen New York-i aotsü. Taoba küm WTC (World Test Championship) final nung ama asayartem shirnok team semifinal atema qualify mesütetlir parnok takaraba aotsü," ta ketdangsur yagisa metetdaksü.

Asayamung ya USA aser West Indies nung asayar asünung stand-by asayartem karibo team meiner aotsü imlar, kechiyong asayar kar danga yirura mesüra mepaitoktepa maparen adokra parnok melentüsa akümtsü.

National selectors pezü team den aotsü aser parnoki asayatem timba reprangtsü, kechiyong iba World Cup ya taoba mapang dang nungi balaka kong parnoki asaya teshimtet kar nung dang shilem agi aser tanungba TV ajanga dang repranga liasü.

Workload management dak sendakba nung tetuyuba kecha agüja mali, kechiyong asayartem ya IPL ita ana asayaba mapang pei club kübok alitsü.

"Centrally contracted mesüra tenük yoka aliba asayar kar danga yirura pa indang ken o ji NCA indang Medicine aser Sports Science team-i agizüka achayangtsü.

"Ano centrally contracted asayar aser tenüka yoka aliba asayartem (India A, Emerging India) atema S&C (strength and conditioning) coach aser physio temi NCA ya maneni inyaksangshia atadaksütsüla. Ajisüaka asayar ka franchise balala nungi asayaba mapangbo BCCI-i parnok asaya kwi nung asayatsüla ibaji mazüoktettsü," ta source yagisa metetdaksü.

PCB-i Babar nem tanaben captain mapa bendaktsüner

Lahore, Metsüremi/March 30 (Agencies): PCB mendenbuba Mohsin Naqvi-i, white ball formats atema Babar Azam nem captain mapa agütsüogo, ajisüaka Babar-i tang tashi telemtetba magi lir.

Osang ajanga ashiba agi, captain mapa agizüksü atema pa taginüba kar lemsatepogo, kong coach tem shimba mapang pa nema shilem agidaksütsüba densema lir. Babar-isa, pa nem formate asemprongla indang captain mapa agütsütsüla ta shiogo.

Iba ken o dak sendakba nung national selection committee züngsemtem tebilemba balala lir. Taoba Punjab caretaker minister, shiba cricket asaya background nungi masü, pai Babar nem tashi tulukabo magütsünür.

"Selection committee nung züngsem kari New Zealand den April ita kidang asayatsü aliba asayamung ya Shaheen Shah Afridi lenisüba nung



Babar Azam

asayadakja pa nem maongka ka agütsünür," ta source kati ashi.

Source-isa, Babar nem captain mapa magütsü tsüngda asayamung ka anabo atadangtsüla ta bilemer.

Temetetsü kaji Muhammad Yousuf, Asad Shafiq, Abdul Razzaq, Wahab Riaz aser taoba minister, Bilal Afzal nunger densema selector tem kari Mohsin Naqvi den senden amenba sülen pai telemtetba agiang ta shiogo.

Rankireddy aser Shetty nati Saina indang record ajatetogo



Rankireddy aser Shetty

New Delhi, Metsüremi/March 30 (Agencies): India nunger nüngtugu tebur badminton tarep asayar Satwiksairaj Rankireddy aser Chirag Shetty nati, Saina Nehwal-i India nunger asayartem rongnungi Badminton World Federation (BWF) world rankings nung hopta timtiba temaba jenjang nung aliba otsü tasen ka yanglur aliba ajatetogo.

Rankireddy aser Shetty na hopta terbuba temaba jenjang nung lir. Hopta ter tashi temaba jenjang nungi mainshiba sülen Nehwal-i 2015 küm August 18 nungi October 21 tashi temaba jenjang nungi hopta teku tashi mainshi-i aliba ajatetogo.

Tena ya 2022 küm nungi kanga junga asaya tenzük aser iba mapang tenati tongtibang BWF asayamung aser championships tem koka liasü. Taküm tenati China Open, Malaysia Open, aser India Open nunger ajak nunga kanga junga asayaba ajanga temaba jenjang tongtetogo. Maneni French Open nung takok anguba sülen tebur tarep asayartem rongnung tena jenjang yanglushia liasü.

Rankireddy aser Shetty nati tang point 1,02,303 ngua lir aser tena tanabuba jenjang nung aliba South Korea nunger tarep Kang Min Hyuk aser Seo Seung Jae dang nungi point 5000 dak tema agi timba lir.

BILEMDANGANG

"Easter ajanga bener arutsüba sempet tulutibaji timla lir."